

11. marts 2015

**2013-imut Nunatta Karsiata naatsorsuutaasa akuersissutigineqarnissaannik siunnersuut**  
(Aningaasaqarnermut Aatsitassanullu Naalakkersuisoq)

Nunatta karsiata 2013-mut naatsorsuutaasa Inatsisartuni siullermeerinnilluni oqaluuserineqarnerinut Siumumiit imaattumik oqaaseqaateqassaagut;

Nunatta Karsia 2013-imi Inatsisissatut siunnersuumi 77 mio. kr.-inik sinneqartooruteqassasoq missingersuusiarineqarpoq, ilassutitut aningaasaliissutit ilanngunneqarnerisigut 99 mio. kr.-inik amigartooruteqarnissamik missingersuuteqaraluarluni, taamaasilluni pitsanngoriaat 178 mio. kr.-iuvoq.

Siumumiit nunaannaarutigaarput Pisortanit akuerisaasut kukkunersiuinermi suliaqartut Nunatta karsiata 2013-mut naatsorsuutaat immikkut mianersoqqussutinik oqariartuuteqarfiginngimmassi, tamanna pitsaasutut nalilerparput.

Nunatta karsiata taamak inissisimaneranut tunngavilersuutigineqartut arlaqarput, isertitat amerlanerusimapput killormuuanilu nunatsinni pisariaqartitsineq tunngavigalugu aningaasat atorluarneqarusimasinnaagaluarlutik.

Maanna Suliaq sukumiisumik suliarineqartussanngorluni Kukkunersiuinermi Ataatsimiititaliamut suliarineqartussanngorlugu ingertinneqassaaq. Kukkunersiuinermi ataatsimiititaliap pisussaaffigaa aningaasat akuersissutit naapertorlugit iliuseqartoqarsimanersoq, aammalu pissusissamisoortumik illersorneqarsinnaasumillu ingerlatsisoqarsimanersoq nalilersugassaralugu.

Taamak naatsumik Siumumiit oqaaseqarluta inatsisartut kukkunersiuinermut ataatsimiititaliaani aappasaaneerneqannginnarani sukumiisumik misissungassanngorlugit ingerlateqqipparput, Kukkunersiuinermut ataatsimiititaliaq sukumiisumik sulilluarnissaannik kissaallugit.

Suka K. Frederiksen, Siumut